

# Малин төлән менд хадгълхмн

С. С. САНГАДЖИЕВ,

„Раздольный“ совхозин ах ўкрч\*\*

Давсн джил хальмг олн-әмтнә джиргълд йилгъән темдгтә, байрта джил билә. Эн джилд Коммунистическ партин Ленинск Централън Комитетин седврәр, Советск правительствин шиидврәр хальмг келн әмтнә автоном хәрү токтагдла. Мана олн-әмтн туст гаргъгдсн хаджгър йовдл бұклдән уга кегдәд, Хальмг автономн танъгъчин тўргн өсдж-өргджлтин төлә сән гидг бәәдл учрагдсн.

Мана совхозд 169 өрк-бұл хәрү ирв. Эн өрк-бұлмўдин кōдлдж чадх аргъта улсн цугтан совхозин производствд

кōдлджәцхәнә. Хальмг улсас фермин толгъач болдж 2 кўн, ах хōбчнр болдж—13 кўн, ах ўкрч болдж 2 кўн кōдлджәнә, трактористнр болн шофермўд болдж 20 шаху кўн, тосхлтд 30 гар кўн кōдлджәнә. Ниднин джил мана совхозд шаврар болн хулсар 60 гар гер бәргдв. Эн джилд улм олар гермўд бәрхәр седджәнәвдн.

Би ниднин джилин апрель сард совхозд ирләв. Ирснәсн авн ах ўкрч болдж кōдлджәнәв. Мини гуртд махна тохмин 138 телгъа ўкр бәәнә. Малин чинән сән. Ўвлин малин бәәрнўр 100 тонн өвсн зōбгдв. Ма-

лан сәәнәр, гару угагъар ўвлзўлнәвдн. Манд ўкрмўд тугългън эклчкв, ода 7 ўкр тугълчкв, тугълмуднъ бўрн-бўтн сән бәәцхәнә.

Мана совхоз Иджл голин кōвәд бәәнә. Бидн газр услад өвснә, эрднч-шишә, сорго, люцерн өвсн мет тиим малин хотин культурин элвг ургъц авх цуг эв-аргътавдн.

1958 джилд ўкр болгънас нег тугъл бәрәд, тер төлән цугтагъинъ асрдж хадгълх даалгъвр авчанав.

\*\*Крайин XI-ч партиин конференцд келсн ўгәс.